

# 1 Timoti

## Kerek Mimo Poolbed Timoti Yaa Wongkoon

### *Kerek Kee Komo Dowad Wongkoon*

Timoti kuu kambong Laistaraman. Yawodki kuu Gurikman, yawaan kuu Yuu wonong Yesu yaa anam andeen. Aron yenambed Pool kuu weng amun dakmen yareboon kuyaa kuu Timoti yoom yarebiwen. Kwane, Pool kuu Efesus aom weeb ayoobmimiib dobere weng amun kedmengkandoon kuu Timoti yoom God ye deme awiniwen. Kwane, Pool kuu Timoti nen anam andiwendan Efesus aom doriib yi ooni dowad kowekore kambong yena yaa wonoon. Wonoone aron doboob keruune kerek kee wongkoon. Wongkoon kuu: 1. Anam andiwendan yaa ooni ye kiwaan ye wengiib, 2. Nedbe kurikuri kami ye kiwaan ye wengiib, 3. Dudi kedmengkandidan kebene andi ye wengiib kui. Wongkoon ye weeb kuu AD 64 areb.

### *Korok Weng*

1. Amun Kerundi Ye Weng Ibduruk (1:1-2)
2. Dudanabi Kedmengkandidan Yaa Kamkono Weng Kowoon (1:3-11)
3. Yariman Yaa Kubi Weng Kowoon (1:12-17)
4. Timoti Yaa Komo Dowad Wongkoon Ye Weng Ambobanoon (1:18-20)
5. Nedbe Kurikuri Kamimaibdan Yi Korok Deme Ye Kerekmen Ye Weng (sapta 2—3)

6. Dudi Kedmengkandi Yaa Kebeni Ye Kiwaan Ambobanoon (sapta 4)
7. Nimakarub Maa Maa Kerekmen Yaa Awandi Ye Kiwaan Ambobanoon (5:1—6:2)
8. Weng Maa Maa Ben Dakmoon (6:3-19)
9. Yeenbon Andedme Kebeni Weng (6:20-21)

<sup>1</sup> Ne kuu Pool, Yesu Keresumbed kinoona ye apaso keraan. Nub Bobni Yaa Burudande Bindi Ye God yoom ye ande meedmuub ye karub Yesu Keresu yoombéd deme kee ambangkok ande kiniwen ye karub kuu ne kei.

<sup>2</sup> Timoti, eb yaa wongkani keebdaan. Nub anam andi yaambéd eb kuu ne dana anam kerewen.

Eb yaa kabamoon keebdi ye mimyob dowakeniib mimyob keebde kakman are nonondandiyiib yewenubmo dobiriyiib kuu Ambe God yoom nub Yariman Yesu Keresu yoom yaambéd bangkabdime.

### *Dudanabi Ye Kedmengkandidan Yaa Kaadkere*

<sup>3</sup> Ne kuu ambibkin Masedonia yaa wenoni daabdaan kuu, kwane eb kuu Efesus aom kwane dobereneb karub yena dudanabi ye kedmengkandi kuu kamaib ande kebende. <sup>4</sup> Yi kangkon yi awoya yi moo dakmenabembiriyiib kurin kurin yi awoya kumbed ari doroon doroon miniwen ande yi aningko dakmenabembiriyiib kuu kamaib ande kebende. Kwane, weng keyaambéd wengberenabi yeman kerimaib, kukuu God ye deme aromne awini yemanban. Kedi, God ye deme aromne awini kuu anam andi yaambéd.

<sup>5</sup> Kwane andi ye weng kee daabdaan kuye dowad kuu, mimyob dowaken darewoob keriyeman. Mimyob dowaken kee niindem aom minikmanakiibbaniib inamen amunmoyiib aadidmiyiibban ye anam andiyiib yaambed minimaan. <sup>6</sup> Nimakarub yena kuu inamen keyaa koronde weng anamban idiibban ye kiwaan yaa winiwen. <sup>7</sup> Yi kuu God ye amob kedmengkandidan kerandamiib kumban, komo komo dakmiib ye weng id kuu yikaadban, arudkono ye weng dakmiib ye weng id kangkon yikaadban.

<sup>8</sup> Nub nubkaad, God ye amob kuu amun, amonombe arewa ye dowad awinokban keraniib kumbed. <sup>9</sup> Nub kangkon nubkaad, God ye amob kuu yorokmodan yi dowad ongmino, God ye amob kuu amob domabangkidaniib wabkadaniib God yaa angkurom korokbeniwendaniib ambarakmidaniib God yaa wunesariwendaniib okad yiri ye inamenmodaniib ambe ena yenbandiwendaniib kumka kuman yenbandidaniib <sup>10</sup> nenem kamidaniib karub yikanmo awanoon awanoon kamidaniib karubbed yena awingke yid benib ari berengkimaibdaniib dudanabidaniib kangdod aom dudanabidaniib kane kanembed kedmengkandi anam yaa bon keriwendaniib kuu yi dowad God ye amob kuu ongmoon.

Kedmengkandi kee <sup>11</sup> nambiriyiib amun kerundiyyiib ye God ye weng amun daboknoon. Kwane, yembed weng amun kee oone dakmok ande kawoon.

### *God Yaa Eso Andoon*

<sup>12</sup> Ne inamen yaa aromkono kawoon ye karub, nub Yariman Yesu Keresumbed ambangkembere

awinaneeen korondaanban ande meenekore kine kawoona ye deme awinaan kowe, ye yaa eso andimain. <sup>13</sup> Kurin kuu ne kuu yeremborom ye karub, Keresu yaningko monmareni yenbandeni kamimain kumban, yembed mimyob keewe kakman are nonondandoon, amborom kuu ne nonoon anam andindombed kamimamaan kowe. <sup>14</sup> Kwane, nub Yarimanbed ne yaa kabamoon kondoon ye mimyob dowaken kuu yimin yiminmo kawoon. Kwane, angkon Yesu Keresu yaambéd anam andiyiib mimyob dowakeniib monoon kuu dabokne kawoon.

<sup>15</sup> Kedi, Yesu Keresu okad yiri monoon kuu ambarakmidan kuu bobni yaa burudande bindok monoon. Weng kee anam, wengambere korem awini yeman. Kedi, ne kuu ambarakmi miin arewaman, karub yena arebban, <sup>16</sup> kumban ne kuu kwamune areb doriin kumbed, Yesu Keresumbed ne dowad yodbirimban no iwari meedme doroone ne kuu ye mimyob keende kakman are nonondandi ye inamen wedmeni anam andaan. Ye kuu ne yaambéd kumun korokboon kuu ne kuu ambarakmi miin arewaman kumbed anam andaan kowe, yimin kuu kane kane ye yaa anam andaniib kuu wadkeri aron korem yeman kandaniiib.

<sup>17</sup> Kwane, aron korem korem ye Korok Darewoob, bobnindeban ye God, wedmindeban ye God, God yembedmo kui, ye yaa aningko darewoowiib nambiriyiib kerok, aron korem korem. Anam kwanok.

*Anam Andi Ongme Awine*

<sup>18</sup> Ne dana Timoti, eb dowad profesi weng wengambere dakmiwen ye kerekmen yaambéd kedmengkandi kee kabdaan. Profesi weng kee wengambere awinaneeb kuu, arewa menebaneen yaa kuu amunmo dobiriyiib ninanabe burudande. <sup>19</sup> Eb anam andi ongme awine. Meeni dohiri inamen kiwaan amunmombéd dobere.

Nimakarub yena kuu inamen kee korondiwe yi anam andi kuu kan kubunoon, karub yena yi konoo aombéd arewa domiiwe bot ari wowe monmaroone kankubunemoon areb keriwén. <sup>20</sup> Kwaniwendan kumaom yena kuu Aime-naeyus yoom Aleksandee yoom kui. Nembéd yi kuu beni God yaningko monmaraib andi ye dowad Seten ye dingki ari nongkobaan.

## 2

### *Komarewa Kurikuri Kami*

<sup>1</sup> Ibduruk kuu ne dowaken darewoob kuu, dowaken ye dowadiib nimakarub yena yaa dabab meneboon ye dowadiib eso andi ye dowadiib kurikuri kamime, nimakarub korem yi dowad.

<sup>2</sup> Korok dareb darewiib kane kane korok keriwendaniib yi dowad kurikuri kamime. Kuye dowad kuu nub kuu yewenubmo nangkemmo yena yi arinambo ari amunmo dobiriyiib God ye dowaken yaambéd dobaranuub. <sup>3</sup> Kuu amun kii. Kwananuub kuu nub Bobni Yaa Burudande Bindi Ye Godbéd nub yaa kubendaneen. <sup>4</sup> Ye dowaken kuu nimakarub korem anam andaniib kumbéd bobni yaa burudande bindaneene anam anam yaa yikaadkeraniib.

<sup>5</sup> Kedi, God kuu mimo, yenayiibban. Kwane, God dore nimakarub dore wedyiri dohiri ye

karub kuu mimo, karub Yesu Keresu, yembedmo.

<sup>6</sup> Ye kuu yeka yemeren nimakarub korem bididi dowad kondoon. Kukuu yi akmi yeman, aron anam ari keroona bindi ye kiwaan ongmoon.

<sup>7</sup> Kuye dowadbed Yesu ye weng kidangkambon ari dakmi ye demeyiib apaso demeyiib Yuudandan yaa anam andi anam ye kedmengkandi ye demeyiib kine kawoon. Weng kee iranmi ye weng dakmokban, anam dakmaan.

<sup>8</sup> Ne dowaken kuu karub korem dingki kankoone kurikuri kerimaib kuu noriniibban wengbiriyyibban inamen karadmo yaambéd kwamimamime.

### *Nima Yi Dobiri Kerekmen*

<sup>9</sup> Nangkon ne dowaken kuu nima kuu karub ye inamen monmari ye ebkadbed inwaraib, ebkad amunmo inwarime. Kurikuri wini dowad, kerengkandime andi ye inamen darewoobbed inwaraib. <sup>10</sup> Yimin kuu nima kane kanembed nub kuu God yaningko kankoonimaub andaniib kuu amun amun kamime.

<sup>11</sup> Korok korokbed kedmengkandibka yi dabderem aombéd nima kuu iwari kan kubune yirimbed kere kaadkeraniib kuu yimin.

<sup>12</sup> Nembed yedmaan kuu nimambéd karub yaa kedmengkandaniib o korok keraniib kuu amob andaan. Nima kuu kurikuri aron ari iwari dobirime, <sup>13</sup> amborom kuu Adam yedin ongmekored Iv kuu ongmoon kowe. <sup>14</sup> Kwane, Adam yaa kuu bironindo, Iv kuu birondoobkob ambarakmeen. <sup>15</sup> Kwamunekob, nima kuu dana wanabimaib kuu dabab kandimaib kumban, yi kuu wabkadiibban kumbéd yi anam andiyiib mimyob dowakeniib karadmo dobiriyiib awine

dobaraniib kuu Godbed bobni yaa burudande bindaneen.

### 3

#### *Kuristendan Ooni Ye Korok Korok Yi Dobiri*

<sup>1</sup> Nembed weng kee yedmandamaan kuu anam kai kii. Karub kanembed kuristendan ooni ye korok keru ye inamen darewoowiib meenoka kuu amun kii, amborom kuu deme kee manimanandeb kowe.

<sup>2</sup> Kwani kowe, anam kuu kuristendan ooni ye korok kuu ambarakmoon ande kadwonimokban ye karub kwanembed kerok. Ye kuu wonong mimoyiib, kirod norin wandiyiibbaniib yemeren ongme kangkadme dobiriyiib ye karub. Ye kuu inamen amun awinaane ye yaa karub yenambed amun andenimaib ye karub. Ye kuu angkodmenandi ye dowakeniwa angkon ye kedmengkandimaan kuu yena kirod kaadkerimaib ye karub.

<sup>3</sup> Ye kuu ok arewa anembiri awaanban, angkon nangbi awaanban. Kwane, ye kuu nangkem yewenub ye karub, angkon od yaa meeni darewoob ye karubban. <sup>4</sup> Ye kuu ye nimadana korobe ooni ye karub, angkon ye dana meed yaa kedmengkandeene ye weng yaamo wengambere awine kamimaib ye karub. <sup>5</sup> Kedi, ye kuu ye nimadana korobe oonokban keraneen kuu kuristendan kuu korobe oonaneen dee? Yiminban!

<sup>6</sup> Ye kuu kibirebyamo kuristen keroonbedban, amborom kuu korok keraan andekore kerengkan ye inamen darewoob keraneen, Seten ye dabab

areb kwane keraneen. <sup>7</sup> Ye kuu kuristenbandanbed karub amun andimaib ye karub. Kwamune kowe, ye aningko kuu kankubunaibban kerene Seten ye birandi yaa kombaraanban.

*Kuristen Awande Keendombiri Ye Korok Korok Yi Dobiri*

<sup>8</sup> Kuristendan awande keendombiri ye karub ye kangkon nimakarubbed karub amun andimaib ye karub, kobkowiibban ye karub, ok arewa anembiri ye karubban, birande od bi ye karubban. <sup>9</sup> Yi kuu minikmanakiibban kumbed anam andi korokboon ye weng yobdoodmo awinime. <sup>10</sup> Kwani kowe, ibduruk kuu yi komboon darobendekoriwa yimin keroka, kuristendan awande keendombiridan yi deme kwane awinime.

<sup>11</sup> Kwamune areb kumbed nima kangkon nimakarubbed nima amun andimaib ye nima, wungkandi dandi ye nimamban, kirod norin wandi ye nimamban, anammo dakme ambangki ye nima kui.

<sup>12</sup> Kuristendan awande keendombiri ye karub kuu wonong mimo ye karub. Ye kuu ye dana meediib ye ambibdaniib amunmo ooni ye karub kumbed deme kee konime. <sup>13</sup> Kane kane deme kee korobe ambangkaniib kuu aningko amun yeman kandenib Yesu Keresu yaa yi anam andi arudkonomo keraniib.

*Kedmengkandi Anam Anam Kuu Godbed Korokboon*

<sup>14</sup> Ne dowaken kuu eb yaa aron doboobban arimbed mananiin, kumban kwamune kame andi ye weng kuu eb yaa wongke keebdaan, amborom kuu <sup>15</sup> barang maambed kebenewaneena



kired manainban keraneen kuu, God ye karuwa nimaya yi dohiri komarewa kuu ebkaadkerundaneeb. Yi kuu wad doreen ye God yaa nedbe kurikuri kamidan, yi kuu dodkono aromkonombed ambib aromne dohirimaun kwane areb kuu anam anam naawon awine kankoonimaibdan kii.

<sup>16</sup> Weng dakmandamaan kee aadidmindeban ye weng kii, God ye dowaken yaambéd dohiri korokboon kuu barang miin darewoob kai.

Ye kuu karub anam kere monoon.

Monoone, Kingkin Karadmombéd ye kuu yorokmoman kii ande korokboon.

Korokboone, engyus kuu wedmeniwen.

Wedmiiwe, ambibkin maa maa yaa ye weng daandiwen.

Daandiwe, okad yiridan anam andiwen.

Anam andiwe, nambiri ari nen daanoon.

## 4

### *Awad Yi Yoman Winiwendan Yi Kedmengkandi*

<sup>1</sup> Kwane, Kingkin Karadmombéd dian yedmoon kuu, kibik aron yeenbon kere weneen aom kuu, nimakarub yena kuu anam andi yaa koronde dudanabi ye awad yi yoman wenenib awad arewa yi kedmengkandi yaa awinaniib kii. <sup>2</sup> Yi kedmengkandi kuu dudanabi aadidmi ye karuwa ni-mayambéd ben wenebe derendaraniib. Yi kuu inamen arewa o amun wengyundindebandan.

<sup>3</sup> Yi kuu nima awadmi kuu amob ande kebenenib animan yena anaib andimaib. Kumban Godbed animan korem ongmenaboon kuu anam ande anam anam kaadkeriwendanbed benib eso ande ani dowad kui.

<sup>4</sup> Kedi, kumkam korem Godbed ongmenaboon kuu amunmo kii. Komo komo Godbed bangkandaneena baniib kuu God yaa eso andiyiibbed baniib kuu yimin, <sup>5</sup> amborom kuu God yeka ye weng kundukbed yedmooniiib yi kurikuriyiibbed kumkam kuu yuburare karadmo keroon kowe.

*Kurikuri Korok Korok Yi Dobiri*

<sup>6</sup> Kwane, kedmengkandi kee kuristen angkodmia yaa dakmimamaneeb kuu Yesu Keresu ye deme karub amun keraneeb, amborom kuu eb kuu anam andi ye wengiib kedmengkandi yorokmoyiib yi yoman weneneb eb kuristen inamen kainewen kowe. <sup>7</sup> Kwane, God ye inameniibban ye mooyiib idiibban ye mooyiib kuyaa awinaab, wangdandunde. Kwani kowe, ebka ebmeren God ye dowaken yaambbed dohiri dowad kedmengkande. <sup>8</sup> Kedi, id aromkono keru ye deme kuu amun kumban, ebka ebmeren God ye dowaken yaambbed dohiri keembed kuyaa kuu burudande barang darewoob yeman keroon kii. Kuku meeni korem ye awandi yeman, okad yiri dohiriyiib Ewen ari dohiriyiib yaa kuu.

<sup>9</sup> Weng kee anam, wengambere korem awini yeman. <sup>10</sup> Nub kuu anam kwananeen anduwen kuu, wad doreen ye Godbed nimakarub korem yi dowad bobni yaa burudande bindi ye kiwaan ongme ye yaa anam andiwendan kuu bindoon. Kowe, kuye dowadbed arewa menebimaan yaa kuu ninabe deme yobdoodiib awinimaub.

<sup>11</sup> Weng kee dakmaan kee kwamune kedmengkandeneb kwanime ande. <sup>12</sup> Eb kuu kewedman areb weeb yemoon dohirindo

kumban, korondaawa karub yenambed eb kuu kewedmanmo yiminban andebdaib. Kwane, anam andiwendan yaa kuu eb weng dakmiyiib eb dobiri kerekmeniib eb mimyob dowaken keendiyiib eb anam andiyiib eb niindem aom karadmo dobiriyiib yaambéd inamen amun korokbendimame. <sup>13</sup> Eb kuu kidangkambonbed God Ye Weng Karadmo kimingkaneb God Ye Weng Karadmo ambobande wengambirime andeneb kedmengkande ningmone kuyaamo doberemberebka, ne kuu mana.

<sup>14</sup> God ye deme ambangki ye aromkono kabdoon kuu, eb dowad karub maambéd profesi weng wengambere dakmoon yaambéd kurikuri aamkono aamkonombéd eb ari dingki nongkobe kurikuri keriwén yaron arimbed kabdoon kuu korondaab, kwane awinembere. <sup>15</sup> Eb yaa kwane kame andi ye weng kabdaan kee kuyaamo doberebko nimakarub korem kuu eb anam andi darewoob kerí kuu wedmime. <sup>16</sup> Ebka eb dobiriyiib eb kedmengkandiyiib kuu korobe kaadkere darobe dobere. Kwane doberembere, amborom kuu kwamunaneeb kuu ebbedmomban ewiib ebbéd kedmengkandeewe wengaibdaniib kuu bindaneen kowe.

## 5

### *Kuristendan Yaa Dakme Ongkandi Ye Kiwaan*

<sup>1</sup> Aamkono aamkono yaa kenambun weng yobdood daandaab, eb ambe yaa ongkane daani-maab areb kwane dakme. Kwane, keweddan yaa kuu eb ambanga yaa daandimaab areb kwane dakme. <sup>2</sup> Kwane, nima aamkono yaa kuu eb ena

yaa daandimaab areb kwane dakme. Kwane, nima koyu yaa kuu eb oniya yaa daandimaab areb kwane dakme, meeni karadmombed dakme.

*Nima Irib Yaa Awandi Ye Kiwaan*

<sup>3</sup> Nima irib yi karubkimiibbandan kuu kuristendanbed korobe oone keendombirime.

<sup>4</sup> Kumban wonong irib kuu dana meediib o awoyayiib keruka, yi kuu God ye dowaken yaambed yidin yu oone keendombirime. Kwananiib kuu yumbed komo yi awandeen kuu neman inande awandimamime. Kwananiib kuu Godbed yi yaa kubendaneen kii.

<sup>5</sup> Wonong irib yumbirimo oonidaniibban kuu Godbed anam awawaneen ande meenekoru amnoomiib awingyawiiib kurikuri kere awawok ande kaamobimaun. <sup>6</sup> Kumban wonong irib yena kuu yi kad ye inamen yaamo ambangkimaib kowe, wad doriib kumban yi kingkin kuu bobnemoon areb keroon.

<sup>7</sup> Kwamime ye weng dakmandamaan kee yi yaa kangkon konde. Kondebko wengambere awinibka, yenambed irib yaa ambarakmeen andendaibban keraniib. <sup>8</sup> Kane kanembed ye karubkim awandokban keraniib kuu arewa, kumban yi ambe ena awoya oniya ambanga damana awandokban keraniib kuu kuyaa burudande miin arewa kai kii! Kukuu yi anam andi aadikmiwen, yi inamen kuu anam andindodan arebban, inamen miin arewa kii.

<sup>9</sup> Nima irib awandi dowad yi aningko wongkaneeb ye nima kukei. Yu kuu weeb 60yiiibbed ari dobureen kii. Yu angkon yu karub wad doboroon yaron yaa domonenekoru karub maa

yoom dohirindo ye wonong, <sup>10</sup> yu amun amun kami yikaadkeriwen ye wonong, yu dana ongme kedmengkandeen ye wonong, angkodmenandi ye dowakeniib ye wonong, yon ogi deme areb yukareb kankubune God ye karadmodan awandi ye wonong, dabab menebimaandan yaa awandi ye wonong, deme amun maa maa ambangkimaun ye wonong kui.

<sup>11</sup> Kwane, kiomnindo ye nima irib kuu yi aningko wongkaab, amborom kuu karub awani ye inamen kuu darewoob kerenib, Yesu Keresu ye deme korondaniib kowe. <sup>12</sup> Kwamune kowe, yika yimeren dabab kanmananiib, amborom kuu Yesu Keresu yaa amob ongmiwen kuu domokbaniib kowe. <sup>13</sup> Yi kangkon ogood yarebenib wungkandi dandi ye nima kerenib wingkanambengkan ye nima kerenib weng arewa dakmenabinban ye weng dakmaniib.

<sup>14</sup> Kwamunekob, ne dowaken kuu kiomnindo ye nima irib kuu karub awanenib, dana wanabenib, ambiwoom deme oonenib, amun amun kamime. Kwananiib kuu God ye bonmanbed yi dowad nima arewa andundaanban keraneen. <sup>15</sup> Yi kuu karub awadmime andid, amborom kuu kibikee anam kuu nima irib yena kuu koronde Seten ye yoman winiwen kowe.

<sup>16</sup> Kwane, anam andeen ye wonong kuu yu karubkim aom kuu wonong iriwiib keroka yumbed awanduk, wonong irib yu awandi dowad kuristendan yi dingki ari kowaun. Kwamunanuun kuu amun, amborom kuu kuristendanbed karubkimiibban ye nima iribmo awandaniib kuu yimin keraneen kowe.

### *Kurikuri Korok Korok*

<sup>17</sup> Kurikuri korok korokbed kuristendan yaa ongme oonendimaib kuu deme amunmo awini-maib kowe, yiib korok keriwen ye dowadiib ooni deme amunmo ambangkimaib ye dowadiib an-ingko darewoob arimbed kondime. Ne meeni darewoob kuu Yesu ye weng amun ambobandenib wengambirime andimaibdan yoom ked-mengkandidan yoom yi dowad weng kee dakme wongkaan. <sup>18</sup> Kwamune wongkaan amborom kuu, God Ye Weng Karadmo yaambad wongkoon kuu “Buromakaumbad wiit norok danabi dowad animari dodkanmo dewenebuun kuu wiit be anandamuka kebenendaib.” andoon. Angkon maa wongkoon kuu “Karub deme awinoon kuu kakmaniib kandod yimin.” andoon.

<sup>19</sup> Karub mimombad mene kurikuri korok yaa ambarakmoon kii andoka wengamberenaib. Kumban karub ayoob o ayoobmimbad mene anam ambarakmoon kii andibka wengambirime.

<sup>20</sup> Korok kanembad anam ambarakmoka kuristendan yi kidangkambad kebenenibko korondok. Kwananiib kumbad yena kangkon kwamunaub ande meene kaadkeraniib.

<sup>21</sup> God yoom Yesu Keresu yoom Godbed kingkoon ye engyus yoom yi arinambo arimbed nembad eb yaa amob kee yedme kowaan kuu, weng ke kabdaan kee nimakarub korem yi dowad ongme awinembere, yena yaa manmo keru ye inamen ambangkaab. <sup>22</sup> Kane kanembad korok kerandamiib kwari kirod dingki kowe kurikuri keraab. Kirod dingki kowe kurikuri keraneeb kuu yi ambarakmi kuyaa daboknemoon areb

keraneeb. Karadmo ye kiwaan kuyaambéd dobere.

<sup>23</sup> Eb kuu ot korere kandimaab kowe, ot aromnok andi dowad okmo kuu koronde ok wain embengmoyiib bune animame.

<sup>24</sup> Nimakarub yena yi ambarakmi kuu dian keraane, wengyundi yaron kerindombéd nimakarub korem kuu yi ambarakmi ye weng wengambere yikaadkerimaib. Kumban nimakarub yena yi ambarakmi kuu biknoon kowe, wengyundi yaron arimo korem wengambere yikaadkeraniib.

<sup>25</sup> Kwamune areb, amun amun kami kuu dian keraane wedmimaib. Kwane, amun amun kami yena kuu dianban kumban biknindeban dian keraneen.

## 6

### *Dabderem Yiri Dobere No Deme Awinembiridan*

<sup>1</sup> Yena yi dabderem yiri dobere no deme awinembiridan anam andiwen korem kuu yi mimim yi kangkodan yi weng wengamberenib yi aningko kuu darewoob arimbed kondime. Kwamunaniib kumbed God yaningko monmaraibban kerenib, nub kedmengkandi yaa kuu arewa andaibban keraniib.

<sup>2</sup> Kumban, yi kangkodan kuu kuristen keroka, yi kuu kamune meendobaib, “Ye kuu ne kuristen angkodmi kowe, ye weng wengambereni ye aningko kuu darewoob arimbed konainban.” andaib. Kumban kwane kamime ye weng kee andaan kuu yi deme kuu amun yemanmo awinime. Kangkoman kuristenban ye deme awini arebban awinime, burudande miin amun awinime, amborom kuu kangkoman kuu kuristenman, yi

angkodmi kowe. Weng kee yi yaa kedmengkande kwane kamime ande.

### *Dudanabi Ye Kedmengkandi*

<sup>3</sup> Karub kanembed dudanabi ye kedmengkandi derendarene kanyarenib nub Yariman Yesu Keresu ye weng yorokmoyiib God ye dowaken yaambéd dobiri ye kedmengkandiyiib ibmo kerokban keroka, <sup>4</sup> yi kuu kerengkandan kerenib inamen ma id kandindeban keriwén. Yi dowaken kuu ogood weng wengberenabi kowe, yi inamen kuu yorokmomban keriwén. Kwani kowe, kuye inamen yaambéd kuu wungkandiyiib nangmiyiib damangkandi ye wengiib anamban ogood inamen keendiyiib <sup>5</sup> wowe korare aye korare ye wengiib menebimaan. Yi inamen kuu korem miin arewa keroone anam anam kuu yi yaa korem boona dowan keroon. Yimbed meenimaib kuu God ye dowaken yaambéd dobiri kuu od bi ye kiwaan manok andimaib kii.

### *Inamen Amuniib Inamen Arewayiiib*

<sup>6</sup> Kumban Godbed komo bangkandoon yaa kuu yimin ande eso andiyiib God ye dowaken yaambéd dobiri kuu amun kerundi yemoon bi yeman. <sup>7</sup> Kedi, nub wooneen kuu yiribmaniib ma kanminindo. Kwani kowe, bobnanuub kangkon yiribmaniib ma kanwanaubban. <sup>8</sup> Kumban, animaniib ebkadiib dobaranuub kuu yimin, God yaa eso andi yeman.

<sup>9</sup> Kwane, kane kanembed yiribman yemoon benamberem ande meenimaib kuu amarakmaniib dee andi ye komboon yi yaa mananeene, inamenniibban ye dowakeniib arud ye barang yaa



dowaken keeniyiib baniib kumbed yi monmara-neen. <sup>10</sup> Kuu kwamune kui, od bi ye dowaken kuu inamen arewa maa maa yemoon ye ambokab. Nimakarub yena kuu od bi ye dowaken darewoob keriwen kowe, anam andi ye kiwaan yaa korondenib dabab yemoon biwen, yimeren maradbed kaaremoon areb keriwen.

### *Komarewa Dobiri Andi Ye Weng Ongkandoon*

<sup>11</sup> Kwani kowe, God ye karub, eb kuu arewa korem keyaa kee kombiri wene. Kumban yorokmo dobiriyiib God ye dowaken yaambéd dobiriyiib anam andiyiib mimyob dowaken keendiyiib erekmab kangdommo dobiriyiib nangkem dobiriyiib keyaambéd awine dobere. <sup>12</sup> Eb anam andi yaambéd arewa menebaneen yaa kuu amunmo dobiriyiib ninanabe burudande. Ebbéd nimakarub yemoon yi kidangkambéd Yesu yaa anam andaan kii andi ye weng yedmewen kuu Godbed wadkeri aron korem ye dowad kinebdoon. Kwani kowe, wadkeri aron korem yeman kee awine dobere. <sup>13</sup> Wad doriibdan korem yaa wadkeri kondoon ye God yoom, Pontius Paillet ye arinambo arimbed ne kuu Godbed kinoonman ye weng ande yedmoon ye karub Yesu Keresu yoom, yi ayooob yi arinambo arimbed nembéd eb yaa amob kee yedme kowaan kuu, <sup>14</sup> weng kee kabdaan kee korondaab awine kande. Kwane arewayiib ande dedmoniyiibban kumbed awine doberebko wene nub Yariman Yesu Keresu angkane mananeen yaron kerok. <sup>15</sup> Kuyaron kuu Godbed ye dowaken yaamo aron kinoon yaambéd kwananeen.

Ye kuu amun kerundi meneboon ye God, yembedmo kuu Korok, ye kuu king korem yi King, yariman korem yi Yariman. <sup>16</sup> Yembedmo kuu bobnindeban ye God, dia winindeban ye nambiri aom doreen ye God, ye kuu karub maa kurin ma wedmenindo ye God, ma wedmenindeban ye God. Ye yaa aningko ambab ariyiib aromkonoyiib aron korem korem kerok. Anam kwanok.

<sup>17</sup> Yiribman yemoondan okad kiri doriib yaa kwanime ye weng kee daande. Kerengkan kamaib, angkon komarewa keraneen ye dowad nub yiribmanbed nubka awandaneen ande meenaib, amborom kuu yiribman dowan keraneen keriyaron kuu yikaadban kowe. Kwani kowe, Godbed nub awandaneen andi ye meenimbed kowime, amborom kuu yembed nub kube dohiri ye dowad kumkam yiminmo bangkandimaan. <sup>18</sup> Yi yaa amun amun kamime ye weng daande. Amun amun kami yemoon kamime, yi yiribman kuu kirim kamaib, nimakarub yena yaayiib numbere awandi dowad nekwime. <sup>19</sup> Kekamune kamaniib kumbed Godbed dowan kerindeban ye kakman Ewen aom nongkobaneene wadkeri anam kandaniiib.

### *Yeenbon Andedme Kebeni Weng*

<sup>20</sup> O Timoti, komo komo bangkabdekore ongme oone andoon kuu arewambed monmaraan ande amukne. Inameniibban ye wengiib God yaa bon kami ye weng yenambed weng anam dudanabe dakmiweniib yaa kuu manakeende.

<sup>21</sup> Nimakarub yenambed dudi weng kee awinekoriwa anam andi ye kiwaan yaa koronde winiwen.

Kabamoon keendi ye mimyob dowaken kuu  
yiib yaa kerok.

**Genesis, Psalms, and The New Testament in the  
Yongkom Language (also called the Yonggom  
language) of Papua New Guinea**

Copyright ©

Language: Yongkom

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 22 Nov 2019

b3f9b0a2-8cdb-5470-8e3c-8250231eee99